

七十二家集

陸平原集卷之七

晉吳郡陸機士衡著

明閩漳張燮紹和纂

頌

漢高祖功臣頌

相國鄼文終侯沛蕭何相國平陽懿侯沛曹參
太子少傅留文成侯韓張良丞相曲逆獻侯陽
武陳平楚王淮陰韓信梁王昌彭越淮南王六
黥布趙景王大梁張耳韓王韓信燕王豐盧綰

長沙文王吳芮荆王沛劉賈太傅安國懿侯王陵左丞相絳武侯沛周勃相國舞陽侯沛樊噲右丞相卬周景侯高陽酈商太僕汝陰文侯沛夏侯嬰丞相潁陰懿侯睢陽灌嬰代丞相陽陵景侯魏傳寬車騎將軍信武肅侯靳歙大行廣野君高陽酈食其中郎建信侯齊劉敬大中大夫楚陸費太子太傅稷嗣君薛叔孫通魏無知護軍中尉隨何新成三老董公轅生將軍紀信御史大夫沛周苛平國君侯公右三十一人與

定天下安社稷者也頌曰

茫茫宇宙上塲下黷波振四海塵飛五岳九服
徘徊三靈改卜赫矣高祖肇載天祿沉跡中鄉
飛名帝籙慶雲應輝皇階授木龍興泗濱虎嘯
豐谷彤雲晝聚素靈夜哭金精仍頽朱光以渥
萬邦宅心駿民效足堂堂蕭公王跡是因綢繆
敵后無競惟人外濟六師內撫三秦拔竒夷難
邁德振民體國垂制上穆下親名蓋羣后是謂
宗臣平陽樂道在變則通爰淵爰默有此武功

長驅河朔電擊瓌東協策淮陰亞跡蕭公文成
作師通幽洞冥永言配命因心則靈窮神觀化
望影揣情鬼無隱謀物無遁形武關是闢鴻門
是寧隨難滎陽卽謀下邑銷印懸廢推齊勸立
連籌固陵定策東襲三王從風五侯允集霸楚
寶喪皇漢釁入怡顏高覽弭翼鳳戰託跡黃老
辭世却粒曲逆宏達好謀能深游精杳漠神跡
是尋重玄匪與九地匪沉伐謀先兆擠響于音
奇謀六奮嘉慮四廻規主以足離項于懷格人

乃謝楚翼寔摧韓王窘執胡馬洞開迎文以謀
哭高以哀灼灼淮陰靈武冠世策出無方思入
神契奮臂雲興騰跡虎噬凌險必夷摧堅則脆
肇謀漢濱還定渭表京索旣扼引師北討濟河
夷魏登山滅趙威亮火烈勢踰風掃拾代如遺
偃齊猶草二州肅清四邦咸舉乃眷北燕遂表
東海克滅龍且爰取其旅劉項懸命入謀是與
念功惟德辭通絕楚彭越觀時攷跡匿光民具
爾瞻翼爾鷹揚威凌楚域質委漢王靖難河濟

卽宮舊梁烈烈黥布耽耽其眇名冠強楚鋒猶
駭電視幾蟬蛻悟主革面靡彼梟風翻爲我扇
天命方輯王在東夏矯矯三雄至于垓干元凶
旣夷寵祿來假保太全祚非德孰可謀之不臧
舍福取禍張旦之賢有聲梁魏士也罔極自貽
伊媿俯思舊恩仰察五緯脫跡違難披榛來泊
改策西秦報辱北冀悴葉更輝枯條以肄王信
韓孽宅土開疆我國爾才越遷晉陽盧綰自微
婉變我皇跨功踰德祚爾輝章人之貪禍寧爲

亂亡吳芮之王祚由梅賁功微勢弱世載忠賢
肅肅荆王董我三軍我圖四方殷薦其勛庸親
作勞舊楚是分往踐厥宇太啓淮濱安國違親
悠悠我思依依哲母旣明且慈引身伏劍永言
固之淑人君子寔邦之基義形於色憤發於辭
至亡與亡末命是期絳侯質木多略寡言曾是
忠勇惟帝攸歎雲鶩靈丘景逸上蘭平代禽豨
奄有燕韓寧亂以武斃呂以權滌穢紫宮徵帝
太原實惟太尉劉宗以安挾功震主自古所難

勲耀上代身終下藩舞陽道迎延帝幽藪宣力
王室匪惟厥武總于鴻門披闔帝宇聳顏誦項
掩淚寤主山周之進于其哲兄俾率爾徒從王
于征振威龍蛻攄武墉城六師寔因克荼禽黠
猗歟汝陰綽綽有裕戎軒肇跡荷策來附馬煩
轡始不釋擁樹皇儲時又平城有謀穎陰銳敏
屢爲軍鋒奮戈東城禽項定功乘風藉響高步
長江收吳引淮光啓于東陽陵之勛元帥是承
信武薄伐揚節江陵夷王殄國俾亂作懲恢恢

廣野誕節令圖進謁嘉謀退守名都東規白馬
北距飛狐卽倉敖庾據險三塗輜軒東踐漢風
載徂身死于齊非說之辜我皇實念高祚爾孤
建信委輅被褐獻寶指明周漢銓時論道移帝
伊洛定都鄴鎬柔遠鎮邇寔敬攸考抑抑陸生
知言之貫往制勁越來訪皇漢附會平勃夷凶
翦亂所謂伊人邦家之彥有王之極舊章靡存
漢德雖朗朝儀則昏稷嗣制禮下肅土尊穆穆
帝典煥其盈門風晞三代憲流後昆無知獻敏

獨昭奇跡察倖蕭相貺同師錫隨何辯達因資
於敵紓漢披楚維生之績幡幡董叟謀我平陰
三軍縞素天下歸心哀生秀朗沉心善照漢旆
南振楚威自撓大略淵回元功響效邈哉惟人
何識之妙紀信誑項軺軒是乘攝齋赴節用死
孰懲身與煙消名與風興周奇慷慨心若懷冰
形可以暴志不可凌貞軌偕沒亮跡雙升帝疇
爾庸後嗣是膺天地雖順王心有違懷親望楚
永言長悲侯公伏軾皇媼來歸是謂平國寵命

有輝震風過物清濁效響大人于興利在攸往
弘海者川崇山惟壤部濩錯音袞龍比象明明
衆哲同濟天綱劍宣其利鑒獻其朗文武四充
漢祚克廣悠悠遐風千載是仰

贊

孔子贊

孔子敝聖配天弘道風扇玄流思探神寶明發
懷周興言謨老靈魄有行言觀蒼昊清歌先誠
丹書有造

王子倚贊

遺彤靈岳顧景忘歸乘平云條忽飄飄紫微

箴

丞相箴

夫導民在簡爲政以仁仁實生愛簡亦易遵網
疏下睦禁密巧繁深文碎教伊何能存故人不
可以不審任不可以不忠捨賢昵讒則喪爾邦
且偏見則昧專聽悔疑耳目之用亦各有期夫
豈不察而帷牆隔之矜已任智是蔽是欺德無
遠而不復惡何適而不追存亡日鑒成敗代陳
人咸知鏡其貌而莫能照其身

策文

策秀才文

昔三代明王啓建洪業文質殊制而命名一致
然夏人尙忠忠之弊也朴救朴莫若敬殷人革
而脩焉敬之弊也鬼救鬼莫若文周人矯而變
焉文之弊也薄救薄則又反之於忠然則王道
之反覆其無一定邪亦所祖之不同而功業各
異也自無聖王人散久矣三代之損益百姓之
變遷其故可得而聞邪今將反古以救其弊明

風以蕩其穢三代之制將何所從太古之化有何異道

紀瞻對策附

瞻聞有國有家者皆欲邁化隆政以康庶績垂歌億載永傳于後然而俗變事弊得不隋時雖經聖哲無以易也故忠弊質野敬失多儀周鑒二王之弊崇文以辯等差而流遁者歸薄而無款誠款誠之薄則又反之於忠三代相循如水濟火所謂隨時之義救弊之術

也羲皇簡朴無爲而化後聖因承所務或異
非賢聖之不同世變使之然耳今大晉闡元
聖功日躋承天順時九有一貫荒服之君莫
不來同然而大道旣往人變由久謂當今之
政宜去文存朴以及其本則兆庶漸化太和
可致也

又

又問在昔哲王象事備物明堂所以崇上帝清
廟所以寧祖考辟雍所以班禮教太學所以講

藝文此蓋有國之盛典爲邦之大司亡秦廢學
制度荒闕諸儒之論損益異物漢氏遺作居爲
異事而蔡邕月令謂之一物將何所從

又對附

周制明堂所以宗其祖以配上帝敬恭明祀
永光孝道也其大數有六古者聖帝明王南
面而聽政其六則以明堂爲主又其正中皆
云太廟以順天時施行法令宗祀養老訓學
講肄朝諸侯而選造士備禮辨物一教化之

由也故取其宗祀之類則曰清廟取其正室之類則曰太廟取其室則曰太室取其堂則曰明堂取其四門之學則曰太學取其周水圍如璧則曰璧雍異名同事其實一也是以蔡邕謂之一物

又

又問庶明亮采故時雍穆唐有命既集而多士隆周故書稱明良之歌易費金蘭之羹此長世所以廢興有邦所以崇替夫成功之君勤於求

才立名之上急於招世理無世不對而事千載
恒背舌之興王何道而如彼後之衰世何闕而
如此

又對附

興隆之政務在得賢清平之化急於拔才故
二八登庸則百揆序有亂十人而天下泰武
丁擢傅巖之徒周文攜渭濱之士居之上司
委之國政故能龍奮天衢垂勲百代先王身
下白屋搜揚仄陋使山無扶蘇之才野無伐

檀之詠是以化厚物感神祇來應翔鳳飄颻
甘露豐隆醴泉吐液朱草自生萬物滋茂日
月重光和氣四塞大道以成序君臣之義敦
父子之親明夫婦之道別長幼之宜自九州
被八荒海外移心重譯入貢頌聲穆穆南面
垂拱也今貢賢之塗已闡而教學之務未廣
是以進競之志恒銳而務學之心不脩若闕
四門以延造士宣丑教以明令德考績殿最
審其優劣厝之百寮置之羣司使調物度宜

節宣國典必協濟康哉有契往代明良來應
金蘭復存也

又

又問昔唐虞垂五刑之教周公明四罪之制故
世歎清問而時歌緝熙姦宄旣殷法物滋有叔
世榮三辟之文暴秦加族誅之律洛刑淪胥虐
濫已甚漢魏遞承因而弗革亦由險泰不同而
救世異術不得已而用之故也寬尅之中將何
立而可族誅之法足爲永制與不

又對附

二儀分則兆庶生兆庶生則利害作利害之作有由而然也太古之時化道德之教賤勢力而貴仁義仁義貴則彊不陵弱衆不暴寡三皇結繩而天下泰非惟象刑緝熙而已也且太古知法所以遠獄及其末不失有罪是以獄用彌繁而人彌暴法令滋章盜賊多有書曰惟敬五刑以成三德叔世道衰旣興三辟而文公之弊又加族誅淫刑淪胥感傷和

氣化染後代不能變改故漢祖指麾而六合
響應魏承漢末因而未革將以俗變由久權
時之宜也今四海一統人思反本漸尙簡樸
則貪夫不競尊賢黜否則不仁者遠爾則斟
參夷之刑除挾誅之律品物各順其生緝熙
異世而借也

又

又問曰夫五行迭代陰陽相須二儀所以陶育
四時所以化生易稱在天成象在地成形形象

之作相須之道也若陰陽不調則大數不得不
否一氣偏廢則萬物不得獨成此應同之至驗
不偏之明證也今有溫泉而無寒火其故何也
思聞辯之以釋不同之理

又對附

蓋聞陰陽升降山澤通氣初九純卦潛龍勿
用泉源所託其溫宜也若夫水潤下火炎上
剛柔燥濕自然之性故陽動而外陰靜而內
內性柔弱以含容爲質外動剛直以外接爲

用是以金水之明內鑒火日之光外輝剛施
柔受陽勝陰伏水之受溫含容之性也

又

又問曰夫窮神知化才之盡稱備物致用功之
極目以之爲政則黃羲之規可踵以之革亂則
玄古之風可紹然而唐虞密皇人之濶綱夏殷
繫帝者之約法機心起而日進淳德往而莫返
豈太樸一離理不可振將聖人之道稍有降殺
邪

又對附

政因時以興機隨物而動故聖王究窮通之
源審始終之理適時之宜期於濟世皇代質
朴禍難不作結繩爲信人知所守大道旣離
智慧擾物夷險不同否泰異數故唐虞審皇
人之綱夏殷繁帝者之法皆廢興有由輕重
以節此窮神之道知化之術隨時之宜非有
隆殺也

傳

顧譚傳

宣太子正位東宮天子方隆訓導之義妙簡俊
彥講學左右時四方之傑畢集太傅諸葛恪等
雄奇蓋衆而譚以清識絕倫獨見推重自太尉
范曄謝景羊徽之徒皆以秀稱其名而悉在譚
下

陸平原集卷之八

晉吳郡陸機士衡著

明閩漳張燮紹和纂

碑

晉平西將軍孝侯周處碑

君諱處字子隱義興陽羨人也氏胄曩興煥乎
墳典華宗往茂鬱其簡書啓三十之淇基源流
定鼎運八百之遠祚枝葉封桐軒蓋列於漢庭
蟬冕播於陽羨二南之價傳不朽而紛敷太護

之音聲無微而必顯山高海濶其在斯焉祖質
少折節早亡吳初召諮議參軍舉郡上計轉爲
州辟從事別駕步兵校尉光祿大夫廣平太守
父魴少好學舉孝廉吳寧國長奮威長史懷安
錢塘縣侯丹陽西部屬國都尉立節校尉拜裨
將軍三部都督大中大夫臨川豫章鄱陽太守
君晉故散騎常侍新平廣漢二郡太守封關內
侯簪紱揚名臺閣標著風化之美奏最爲能亭
亭振美灼灼橫砌徇高位於生前思垂名於身

後遂以罕言不違應期出輔洋洋之風俯冠來
葉巍巍之盛仰繼前賢君初早孤不弘禮制年
未弱冠膂力絕於天下妙氣挺於人間騎獵無
疇時英式慕縱情寡偶俗弊不忻鄉曲誣其害
名改節播其聲譽遂來吳事余厥第謹然受誨
問道朝聞方勵志而滛詩書便好學而尋子史
文章綺合漢思羅開吳朝州縣交辟太子洗馬
東觀左丞中書右丞五官郎中左右國史靖恭
夙夜恪居官次遷尙書僕射東觀令太常卿無

難督匡熙庶績朝廷謚寧使持節大都督塗中
京下諸軍事封章浦亭侯國猶多士君實得賢
汪洋延闕之傍昂藏察察之上射獸功猶見顯
刺蛟名乃遠揚忠烈道自克脩義節情還永布
琳瑯梓杞珪璧棟梁君著默語三十篇及風土
記并撰吳書於是吳平入晉王渾登建業宮醺
酒旣酣因謂君曰諸人亡國之餘得無戚乎君
對曰漢末分崩三方鼎立魏滅於前吳亡於後
亡國之戚豈惟一人渾乃大慙仕晉稍遷總統

初八拜諮議郎除討虜護軍新平太守撫和戎
狄叛寇歸附雍土笑之轉爲廣漢太守郡多滯
訟有經三十年不決者處立評其枉直一朝決
遣以母年老罷歸尋除楚內史未之官徵散騎
常侍處曰古人辭大不辭小乃先之楚而郡旣
經喪亂新舊雜居風俗未一處敦以教義又檢
尸無主及白骨在野收而葬之然後就徵遠近
稱嘆及居近侍多所規諷遷御史中丞正繩真
筆凡所糾劾不避寵戚梁王彤違法處深文案

之及氐人齊萬年反朝臣惡其強直皆曰處吳
之名將子也忠烈果毅庶僚振肅英情天逸遠
性覆轡陝北留棠遂有二天之詠荆南渡虎猶
慄十部之書尋轉散騎常侍輕車將軍廻輪出
於新平士女揮淚褰帷望於廣漢雞犬靡喧振
茲威略宣其惠和晉京遙仰部從迎欽是時氐
賊作逆有衆七萬屯於梁山朝廷推賢以君才
兼文武詔授建威將軍以五千兵奉辭西討忠
槩盡節不顧身命乃賦詩曰去去世事已策馬

觀西戎藜藿甘梁黍期之克令終言畢而戰自
旦及暮斬首萬級絃絕矢盡番系不救左右勸
退處按劍怒曰此是吾効節授命之日何以退
爲大臣以身殉國不亦可乎韓信背水之軍未
遑得喻工輪縈帶之勢早擬連蹤莫不梯山架
壑縋負來歸戎士杆其封疆農人展其耕織秋
風才起追戰勇於雷霆春水方生揮錘同於雲
雨立功立事名將名臣者乎元康九年舊疾增
加奄捐館舍春秋六十有二天子以大臣之葬

師傅之禮親臨殯壤建武元年冬十一月甲子
追贈平西將軍封清流亭侯謚曰孝禮也賜錢
百萬葬地一頃京城地五十畝爲第又賜王家
田五頃詔曰處母年老加以逆旅遠人朕每憫
念給其醫藥酒米賜以終年以大興二年歲在
己卯正月十日葬於義興舊原南瞻荆岳崇峻
極之巍巍北睇蛟川濬清流之澄澈娶同郡盛
氏有四子靖玘札碩並皆志性純孝過禮喪親
頃前之樹染淚先枯庭際之禽聞悲乃下遂作

銘曰

周南著美岐山表靈葉繁漢室枝茂晉庭皎皎
夫子奇特播名幼有異行世存風烈早馳問望
晚懷耿節頗尙豪雄昇名禁闕捨爵策勲允歸
明哲輝赫大晉封豕多故式楊廟略克清天坂
海濱旣折江淮並泝漢水作藩條章斯布俗歌
揆日人謠何暮忠貞作相追蹤絳侯將亭嘉茂
遽掩芳猷潛光陽句返旆吳丘舊闕雖入鄉路
冥浮從榮制墓終非晝遊春墟以綠清淮自流

深沈素懷繚繞朱旒玄堂寂寂黃泉悠悠書方

易折家搗難留鐫茲幽石萬代千秋

此碑據舊集抄之中

多訛謬文理不接且孝侯既戰沒而云舊疾增加奄捐館舍尤可笑也考常州志此碑尚藏于廟而所載亦是如此當是古碑殘缺後人取斷簡以意補湊之用勒于石遂沿以爲真耳尚須

考博

諫

吳大帝諫

我皇明明固天寔生體和二合以察三精濯暉
育慶懷祥載榮率性而和因心則靈厥靈伊何
克聖克仁茂對四象克配乾坤齊明日月考祥
鬼神誕自幼冲叡哲宿照甄化無形探景絕曜
巍巍聖姿文武旣俊有覺德徽兆民欣順將熙
景命經營九圍登跡岱宗班瑞舊圻上玄匪惠
早零聖暉神廬旣考史臣獻貞龍輶啓殯霄載

紫庭展旒飛藻凶旗舉銘榮華熠爍翠蓋繁纓
千乘結駟萬騎重營簫鼓振響和鸞流聲動軫
闔闔永背承明顯步萬官幽驅百靈隨化太素
卽宮杳冥億兆同慕泣血如零

愍懷太子誄

明明皇子成命旣駿保乂皇家載生淑胤茂德
克廣仁姿朗儁當克無疆光紹有晉如何不弔
暴離咎艱曾是遭愍匪降自天肇傾運祚遂喪
華年嗚呼哀哉沉雲旣祛日月增暉靈寵可贈
冤魂難追舊物東反靈柩西歸傷我惠后寂焉
翳滅銜哀駿奔因服就列追慕徽塵興言斷絕
敢諫遺風庶存芳烈其辭曰
巍巍皇基奕奕紫微有命旣集天祿永綏篤生

太子纂德承茂平紹大烈時惟洪胄奇穎發翹
清藻在秀誕自幼蒙逮事武皇展矣太子播此
瓊芳允矣聖祖無言不臧婉孌乘輿名裕德昌
龍集庚戌日月改度赫赫明明我皇登祚厥登
伊何皇統是荷華綏重采翠蓋垂葩鸞旗阿那
玉衡吐和聿來在宮體亮而誠肅雍皇極思媚
紫庭亦旣涉學遵師盛道何年之妙而察之早
讜言必復乖義則考惜天有命太子膺之惟皇
有慶太子承之當究遐年登茲胡耆緝熙有晉

克構帝宇如何晨牝穢我朝聽仰索皇家惟塵
明聖惻惻太子終溫且敬銜辭卽罪掩淚祗命
顯加放流潛肆鴆毒痛矣太子乃離斯酷謂天
益高訴哀靡告鞠躬引分顧景摧剝嗚呼哀哉
凡民之喪有戚有姻太子之歿傍無昵親跼蹐
嚴宮絕命禁闈幽樞偏寄孤魂曷歸嗚呼太子
生冤歿悲匹夫有怨尙或殞霜矧乃太子萬邦
攸望曾天扼腕率土懷傷精感六沴咎徵紫房
爰茲元輔啓我令圖王赫斯怒天誅靡遁攬搶

叱掃元凶服辜仁詔引咎哀策東征光復寵祚
紹建藐孤於時暉服粲焉畢陳庭旅舊物堂者
故臣孰云太子不見其人嗚呼哀哉旣濟洛川
靈旆左廻三軍悽裂都邑如隕慨矣寤歎念我
慙懷

吳大司馬陸公誄

我公承軌高風肅邁明德繼體徽音奕世昭德
昭德伊何克俊克仁德周能事體合機神禮交
徒候敬睦白屋蹢躅曲躬吐食揮沐爰及鰥寡
賑此惻獨孚厥惠和脫驂分祿乃命我公誕作
元輔位表百辟名茂羣后因是荆人造我寧宇
備物典策主冠及斧龍旂飛藻靈鼓樹羽質文
殊塗百行異轍人玩其華鮮識其實於穆我公
因心則哲經綸至道終始自結德與行蒲美與

言溢

吳貞獻處士陸君誄

我聞有命天祿有秩如斯古人而有斯疾兄弟
之恩離形合氣矧我與君年相亞逮綢繆之遊
白矇及朗孩不貳音抱或同襁撫髻並有攜乎
相長行焉比跡誦必共響庶君偕老靈根克固
附翼雲霄雙飛天路人皆年長君獨短祚穀則
同朝遊矣先暮

弔文

弔魏武帝文

元康八年機始以臺郎出補著作游乎祕閣而見魏武帝遺令慨然歎息傷懷者久之客曰夫始終者萬物之大歸死生者性命之區域是以臨喪殯而後悲覩陳根而絕哭今乃傷心百年之際興哀無情之地意者無乃知哀之可有而未識情之可無乎機答之曰夫日蝕由乎交分山崩起於朽壤亦云數而已矣然百姓怪焉者

豈不以資高明之質而不免卑濁之累居常安
之勢而終嬰傾離之患故乎夫以廻天倒日之
力而不能振形骸之內濟世夷難之智而受困
魏闕之下已而格乎上下者藏於區區之木光
于四表者翳乎崑爾之土雄心摧於弱情壯圖
終於哀志長筭屈於短日遠跡頓於促路嗚呼
豈特瞽史之異闕景黯黎之怪頽岸乎觀其所
以顧命冢嗣貽謀四子經國之略旣遠隆家之
訓亦弘又云吾在軍中持法是也至於小忿怒

太過失不當效也善乎達人之讜言矣持姬女而指季豹以示四子曰以累汝因泣下傷哉曩以天下自任今以愛子託人同乎盡者無餘而得乎亡者無存然而婉嬖房闥之內綢繆家人之務則幾乎密與又曰吾媼好妓人皆著銅雀臺於臺堂上施八尺牀總帳朝晡上脯稱之屬月朝十五日輒向帳作效汝等時時登銅雀臺望吾西陵墓田又云餘香可分與諸夫人諸舍中無所爲學作履組賣也吾歷官所得綬皆著

藏中吾餘衣裘可別爲一藏不能者兄弟可共分之旣而竟分焉亡者可以勿求存者可以勿違求與違不其兩傷乎悲夫愛有大而必失惡有甚而必得智慧不能去其惡威力不能全其愛故前識所不用心而聖人罕言焉若乃繫情累於外物留曲念於閨房亦賢俊之所宜廢乎於是遂憤懣而獻弓云爾

接皇漢之末緒值王塗之多違佇重淵以育鱗撫慶雲而遐飛運神道以載德乘靈風而扇威

摧羣雄而電擊舉勅敵其如遺指八極以遠略
必翦焉而後綏釐三才之闕典啓天地之禁闢
舉修綱之絕紀紐大音之解徽掃雲物以貞觀
要萬塗而來歸丕大德以宏覆援日月而齊暉
濟元功於九有固舉世之所推彼人事之大造
夫何往而不臻將覆簣於浚谷擠爲出乎九天
苟理窮而性盡豈長算之所研悟臨川之有悲
固梁木其必顛當建安之三八實大命之所艱
雖光昭於曩載將稅駕於此年惟降神之綿邈

耿千載而遠期信斯武之未喪膺靈符而在茲
雖龍飛於文呂非王心之所治憤西夏以鞠旅
汴秦川而舉旗踰鎬京而不豫臨渭濱而有疑
翼翼日之云瘳彌四旬而成災詠歸塗以反旆
登崤澗而謁來次洛汭而大漸指六軍曰念哉
伊君王之赫奕寔終古之所難威先天而蓋世
力盪海而拔山厄吳險而弗濟敵何強而不殘
每因禍以禔福亦踐危而必安迄在茲而蒙昧
慮噤閉而無端委軀命以待難痛沒世而永言

撫四子以深念循膚體而頽歎迨營魄之未離
假餘息乎音翰執姬女以嚙瘁指季豹而濯焉
氣衝襟以嗚咽涕垂睫而洸瀾違率土以靜寐
戢彌天乎一棺容宏度之峻邈壯大業之允昌
思居終而恤始命臨沒而肇揚援貞客以悲悔
雖在我而不臧惜內顧之纏綿恨末命之微詳
紆廣念於履組塵清慮於餘香結遺情於婉孌
何命促而意長陳法服於帷座陪窈窕於玉房
宣備物於虛器發哀音於舊倡矯戚容以赴節

掩零淚而薦觴物無微而不存體無慧而不亡
度聖靈之響像想幽神之復光苟形聲之翳沒
雖音景其必藏徽清絃而獨奏進脯糒而誰嘗
悼總帳之冥漠怨西陵之茫茫登崔臺而羣悲
貯笑目其何望旣晞古以遺累信簡禮而薄葬
彼裘紱於何有貽塵謗於後王嗟大戀之所存
故雖誓而不忘覽遺籍以慷慨獻茲文而悽傷

弔蔡邕文

彼洪川之方割豈一簣之所堙故尼父之惠訓
智必愚而後賢諒知道之已妙曷信道之未堅
忽甯子之保已效萇叔之違天冀澄河之遠日
忘朝露之短年

哀辭

吳大司馬陸公少女哀辭

冉冉晞陽不遂其茂
暉暉芳華彫芳落秀
遵堂涉室髣髴興想
人皆有聲爾獨無響

附錄

陸機傳

唐太宗

陸機字士衡吳郡人也祖遜吳丞相父抗吳太
司馬機身長七尺其聲如雷少有異者文章冠
世伏膺儒術非禮不動抗卒領父兵爲牙門將
年二十而吳滅退居舊里閉門勤學積有十年
以孫氏在吳而祖父世爲將相有夫勲於江表
深慨孫皓舉而棄之乃論權所以得皓所以亡
又欲述其祖父功業遂作辨亡論二篇至太康

未與弟雲俱入洛造太常張華華素重其名如
舊相識曰伐吳之役利獲二俊又嘗詣侍中王
濟濟指羊酪謂機曰卿吳中何以敵此答云千
里尊義未下鹽豉時人稱爲名對張華薦之諸
公後太傅楊駿辟爲祭酒會駿誅累遷太子洗
馬著作郎范陽盧志於衆中問機曰陸遜陸抗
於君近遠機曰如君於盧毓盧挺志默然旣起
雲謂機曰殊邦遐遠容不相悉何至於此機曰
我父祖名播四海寧不知邪議者以此定二陸

之優劣吳王晏出鎮淮南以機爲郎中今還尙
書中兵郎轉殿中郎趙王倫輔政引爲相國參
軍豫誅賈謐功賜爵關中侯倫將篡位以爲中
書郎倫之誅也齊王問以機職在中書九錫文
及禪詔疑機與焉遂收機等九人付廷尉賴成
都王穎吳王晏並救理之得減死徙邊遇赦而
正初機有駿大名曰黃耳甚愛之旣而羈寓京
師久無家問笑語犬曰我家絕無書信汝能齎
書取消息不大搖尾作聲機乃爲書以竹筥盛

之而繫其頸犬尋路南走遂至其家得報還洛
其後因以爲常時中國多難顧榮戴若思等咸
勸機還吳機負其才望而志匡世難故不從問
既矜功自伐受爵不讓機惡之作豪士賦以刺
焉問不之悟而竟以敗機又以聖王經國義在
封建因採其遠指著五等論時成都王穎推功
不居勞謙下士機既感全濟之恩又見朝廷屢
有變難謂穎必能康隆晉室遂委身焉穎以機
叅大將軍軍事表爲平原內史太安初穎與河

聞王頤起兵討長沙王又假機後將軍河北大都督化中郎將王粹冠軍牽秀等諸軍二十餘萬人機以三世爲將道家所忌又羈旅入宦頓居羣士之右而王粹牽秀等皆有怨心固辭都督頤不許機卿人孫惠亦勸機讓都督於粹機曰將謂吾爲首鼠避賊適所以速禍也遂行頤謂機曰若功成事定當爵爲郡公位以台司將軍勉之矣機曰昔齊桓任夷吾以建九合之功燕惠疑樂毅以失垂成之業今日之事在公不

在機也。潁左長史盧志心害機寵，言於潁曰：「陸機自比管樂，擬君闇主，自古命將遣師，未有臣陵其君而可以濟事者也。」潁默然。機始臨戎而牙旗折，意甚惡之。列軍自朝歌至于河橋，鼓聲聞數百里。漢魏以來出師之盛，未嘗有也。長沙王又奉天子與機戰於鹿苑，機軍大敗，赴七里澗而死者始積焉。水爲之不流。將軍賈稜皆死之初，宦人孟玖弟超並爲潁所嬖，寵超領萬人爲小都督，未戰縱兵大掠。機錄其王者超將鐵

騎百餘人直入機麾下奪之故謂機曰貉奴能
作督不機司馬孫拯勸機殺之機不能用超宣
言於衆曰陸機將反又還書與玖言機持兩端
軍不速決及戰超不受機節度輕兵獨進而沒
玖疑機殺之遂譖機於穎言其有異志將軍王
闡郝昌公師藩等皆玖所用與牽秀等共證之
穎大怒使秀密收機其夕機夢黑幘繞車手決
不開大明而秀兵至機釋戎服著白帻與秀相
見神色自若謂秀曰自吳朝傾覆吾兄弟宗族

蒙國重恩入侍帷幄出剖符竹成都命吾以重
任辭不獲已今日受誅豈非命也因與穎牋誦
甚悽惻旣而歎曰華亭鶴唳豈可復聞乎遂遇
害於軍中時年四十三二子蔚夏亦同被害機
旣死非其罪士卒痛之莫不流涕是日昏霧書
合大風折水平地尺雪議者以爲陸氏之冤機
天才秀逸辭藻宏麗張華嘗謂之曰人之爲文
常恨才少而子更患其多第雲嘗與書曰君苗
見兄文輒欲燒其筆硯後葛洪著書稱機文猶

玄圃之積玉無非夜光焉五河之吐流泉源如一焉其弘麗妍贍英銳漂逸亦一代之絕乎其爲人所推服如此然好游權門與賈謐親善以進趣獲譏所著文章凡二百餘篇並行於世制曰古人云雖楚有才晉實用之觀夫陸機陸雲寔荆衡之杞梓挺珪璋於秀實馳英華於早年風墜澄爽神情俊邁文藻宏麗獨步當時言論慷慨冠乎終古高詞迴映如朗月之懸光疊意迴舒若重巖之積秀千條析理則電折霜開

一緒連文則珠流璧合其詞深而雅其義博而顯故足遠超枚馬高躡王劉百代文宗一人而已然其祖考重光羽幘英運文武奕葉將相連華而機以廊廟蘊才瑚璉標器宜其承俊又之慶奉佐時之業中能展用保譽流功屬吳祚傾基金陵畢氣君移國滅家喪臣遷矯翮南辭翻棲火樹飛鱗北逝卒委湯池遂使穴碎雙龍巢傾雨鳳激浪之心未騁遽骨修鱗陵雲之意將騰先灰勁翮望其翔躍焉可得哉夫賢之立身

以功名爲本土之居世以富貴爲先然則榮利
人之所貪禍辱人之所惡故居安保名則君子
處焉冒危履貴則哲士去焉是知蘭摧中塗必
無經時之翠桂坐幽壑終保彌年之丹非蘭怨
而桂親豈塗害而壑利而生滅有殊者隱顯之
勢異也故曰銜美非所罕有常安韜奇擇居故
能全性觀機雲之行已也智不逮言矣覩其文
章之誠何知易而行難自以智足安時才堪佐
命庶保名位無忝前基不知世屬未通運鍾友

否進不能開昏匡亂退不能屏跡全身而奮力
危邦竭心庸主忠抱實而不諒謗緣虛而見疑
生在已而難長死因人而易足上蔡之犬不誠
於前華亭之鶴方悔於後卒令覆宗絕祀良可
悲夫然則三世爲將嬰鍾來葉誅降不祥殃及
後昆是知西陵結其凶端河橋牧其禍末其天
意也豈人事乎

酬皮襲美

唐陸龜蒙

吾祖仗才力革車蒙虎皮手持一白旄直向文
場麾輕若脫鉗鈇豁如抽屨屨精鋼不足利騁
裏何勞追大可罩山岳微堪折毫釐十體免負
贅百家咸起痿爭入鬼神奧不容天地私一篇
邁華藻萬舌無子遺

陸平原宅

宋唐 訥

舊牒傳遺址悠然歷祀深人無令威至聞異下
邳箴谷水當年溜崑山昔日陰曾堂那復見絲

竹若爲尋

陸平原宅

宋王安石

故物一已盡嗟此年歲深野桃自着花荒棘徒
生箴芊芊谷水陽鬱鬱崑山陰俛仰但如昨遊
者不可尋

崑山

宋王安石

玉人生此山山亦傳此名崖風與穴水清越有
餘聲悲哉世所珍一出受歆領不如鶴與猿棲
忘尙全生

遺事

蔡司徒在洛見陸機兄弟在參佐廨中三問瓦屋土龍住東頭士衡住西頭士龍爲人文弱可愛士衡長七尺餘聲作鐘聲言多慷慨

世說

蔡洪答周刺史俊曰陸士衡士龍鴻鵠之裴猶懸鼓之待鎚

世說

戴淵少時嘗在江淮間攻掠商旅陸機赴假還洛淵使少年掠劫淵在舫上據胡床指麾機於船屋上遙謂曰卿才如此亦復作劫邪淵便泣

涕役劒歸機機彌重之作筆薦焉

世說

陸平原在洛夏月忽思齋東頭竹篠中飲語劉

寶曰吾思鄉轉深矣

世說

陸士衡入洛次河南偃師近夕結陰投宿民居
見一少年姿神端遠與士衡言玄妙有致士衡
心服其能乃提緯古今總驗名實少年亦不其
欣解旣曉辭去士衡脫驂逆旅嫗曰此東數十
里無村落止有山陽王家墓耳知所遇者輔嗣
也衡由此妙達玄理

按晉書載入陸雲事而世說補作士衡據酈道元水

經注曰今居鄉澤野負原來郭多墳隴焉
卽陞士衡會上輔嗣處乃知晉書爲謬

帝嘗問吾彥陸喜陸抗二人誰多彥曰道德名
望抗不及喜立功立事喜不及抗會彥爲交州
重餉陸機兄弟雲曰彥爲先公所拔而答詔不
善安可受之機乃止因此每毀之尹虞謂機曰
士則答詔小有不善毀之無也吾恐南人皆將
去卿卿便獨坐也機意始解

晉書

陸機饋張華鮓發器曰此龍肉也賓客未信華
曰以苦酒漬之必有異漬酒五色光起機反問

鮮王王口積茅下得白魚質狀殊常作鮮笑故
相獻也

陸平原作子書未成吾門生有在陸君軍中嘗
在左右說陸君臨亡曰窮通時也遭遇命也古
人貴立言以爲不朽吾所作子書未成以此爲
恨耳余謂仲長統作昌言未竟而亡董襲撰次
之桓譚新論未備而終班固爲其成琴道今才
士何不贊成公子書

抱朴子

陸機宅在崑山下別宅在谷陽門內今普照寺

其故基也八角井在宅側黃耳冢在村南二百
步華亭有淚鶴灘皆陸氏遺跡

松江府志

集評

陸文如排沙簡金往往見寶

孫興公

孔文舉之書陸士衡之議可謂之文

李充翰
林論

陸機詩其源出於陳思才高辭瞻舉體華美氣
少於公幹文劣於仲宣尙規矩不聳綺錯有場
直致之奇然其咀嚙英華厭飫膏澤文章之淵
泉也張公歎其大才信矣

詩品

陸機爲太康之英安仁景陽爲輔

詩品

陸機才欲窺深辭務索廣故思能入巧而不制

繁

文心
雕龍

士衡矜重故情繁而事隱

文心
雕龍

陸機自理情周而巧

文心
雕龍

陸機斷議亦有鋒穎而腴辭弗剪頗累文骨亦

各有美風格存焉

文心
雕龍

士衡運思理新文敏而裁章置句廣於舊篇豈

暴珠伸四寸之璫乎

文心
雕龍

陸機積篇功臣最顯

文心
雕龍

陸機之弔魏武序巧而文繁

文心
雕龍

士衡子安底蹟于流制文心雕龍

荀悅史乎史乎陸機文乎文乎皆思過半矣文子

沈麟士重陸機連珠每爲諸生講之南史

糾謬

晉劉處士參妻王氏夫人誄

猗猗嘉穎朝陽方翹烈風嚴霜殞此秀條璇璣
倏忽四序競征清商激宇蟋蟀吟櫺

此誄載藝文云晉處士劉參妻王氏夫誄蓋
王氏誄其夫劉處士作也因列在陸機之後
人遂誤爲機作改其題曰晉劉處士參妻王
氏夫人誄今爲駁出聊發一笑